

四庫全書

集部

欽定四庫全書

花菴詞選卷四

宋 黃昇 撰

宋詞

黃魯直

名庭堅號山谷按陳後山云今代詞手惟秦
七黃九耳唐諸人不逮也

驀山溪

別意

鴛鴦翡翠小小思珍偶眉黛斂秋波儘湖南山明水秀

娉娉裊裊恰近十三餘春未透花枝瘦正是愁時候
尋芳載酒肯落他人後只恐遠歸來綠成陰青梅如豆
心期得處每自不由人長亭柳君知否千里猶回首

又
春晴

朝來風日陡覺春衫便翠柳艷明眉戲秋千誰家倩盼
烟勻露洗草色媚橫塘平沙軟彫輪轉行樂聞絃管
追思年少走馬尋芳伴一醉幾纏頭過揚州珠簾盡捲
而今老矣花似霧中看歡意淺天涯遠信馬歸來晚

水調歌頭

春行

瑤草一何碧，春入武陵谿。
谿上桃花無數，花上有黃鸝。
我欲穿花尋路，直入白雲深處，浩氣展虹霓。
祇恐花深裏，紅露濕人衣。
坐白石，歛玉枕，拂金徽。
謫仙何處無人伴，我白螺盃。
我為靈芝仙草，不為朱唇丹臉，長嘯亦何為。
醉舞下山去，明月逐人歸。

江城子

情景

畫堂高會酒闌珊，霎時間，倚闌干。
千里關山，長恨見伊

難及至而今相見了依舊是隔關山
倩人傳語問平安
省愁煩
淚偷彈
泣損眼兒不似舊時單
尋得石榴雙葉子
憑寄與
插雲鬟

踏莎行

春晚

臨水天桃倚牆繁
李長楊
風掉青驄尾
樽中有酒可酬春
更尋何處無愁地
明日重來落花如綺
芭蕉漸展
山公啓欲賤心事
寄天公
教人長壽花前醉

清平樂

晚春

春歸何處寂寞無行路若有人知春去處喚取歸來同
住春無蹤跡誰知除非問取黃鸝百轉無人能會因
風飛過薔薇

鷓鴣天

西塞山前白鷺飛桃花流水鱖魚肥朝廷尚覓玄真子
何處如今更有詩青莢笠綠簑衣斜風細雨不須歸
人間欲避風波險一日風波十二時

菩薩蠻

半烟半雨溪橋畔。漁翁醉後無人喚。疎懶意何長。春風
花草香。江山如有待。此意陶潛解。問我去何之。君行
到自知。

好事近

一弄醒心絃。意在兩山斜疊。彈到古今愁處。有真珠承
睫。使君來去本無心。休汨界紅頰。自恨老來憎酒。負
十分蕉葉。

黃元明

名知命山谷之兄

青玉案

和賀方回韻送山谷弟貶宜州

千峯百嶂宜州路。天黯淡、知人去。曉別吾家黃叔度。弟
兄華髮舊山脩水異日同歸處。樽罍飲散長亭暮。別
語丁寧不成句。已斷離腸知幾許。水村山館酒醒無寐
滴盡空堦雨。

秦少游

名觀一字太虛號淮海居士

水龍吟

寄營妓婁婉婉字東玉詞
中藏其姓名與字在焉

小樓連苑橫空下
窺綉轂雕鞍驟
疎簾半捲
單衣初試
清明時候
破暖輕風
弄晴微雨
欲無還
有
賣花聲過
盡
垂楊院
宇紅成
陣飛鴛
甃玉佩丁東
別後悵佳期
參差難又
名韁利鎖
天還知道
和天也瘦
花下重門
柳邊深巷
不堪回首
念多情但有
當時皓月
照人依舊

風流子

初春

東風吹碧草
年華換
行客老
滄洲見梅吐
舊英柳搖新

綠惱人春色還上枝頭寸心亂北隨雲黯黯東逐水悠
悠斜日半山暝烟雨兩岸數聲橫笛一葉扁舟 青門同
攜手前歡記渾似夢裏揚州誰念斷腸南陌回首西樓
算天長地久有時有盡奈何綿綿此恨無休擬待倩人
說與生怕伊愁

夢揚州

中春

晚雲收正柳塘烟雨初休燕子未歸惻惻輕寒如秋曲
闌干外東風軟透綉幃花密香稠江南遠人何處鷓鴣

啼破春愁 長記曾陪燕遊 酬妙舞清歌麗錦纏頭 殢
酒為花十載 因甚淹留 醉鞭拂面歸來 晚望翠樓簾捲
金鈎 佳會阻離情 正亂頻夢揚州

滿庭芳

晚景

山抹微雲 天連衰草 画角聲斷譙門暫停 征棹聊共飲
離尊 多少蓬萊舊事 空回首 烟靄紛紛 斜陽外 寒鴉數
點 流水遠 孤村 銷魂當此際 香囊暗解 羅帶輕分 謾
贏得秦樓薄倖 名存此去 何時見也 襟袖上空 染啼痕

傷情處高城望斷燈火已黃昏

又 秋思

碧水澄秋黃雲凝暮敗葉零亂空階洞房人靜斜月照
徘徊又是重陽近也幾處處砧杵聲催重簾外風搖翠
竹疑是故人來 情懷增悵望新歡易失往事難猜問
籬邊黃菊知為誰開謾道愁須殢酒酒未醒愁已先回
憑欄久金波漸轉白露點蒼苔

又 春遊

曉色雲開春隨人意驟雨才過還晴古臺芳榭飛燕蹴
紅英舞困榆錢自落秋千外綠水橋平東風裏朱門映
柳低按小秦箏多情行樂處珠鈿翠蓋玉轡紅纓漸
酒空金盞花困蓬瀛豆蔻梢頭舊恨十年夢屈指堪驚
凭欄久疎烟淡日寂寞下蘼城

江城子

春別

西城楊柳弄春柔動離憂淚難收猶記多情曾為繫歸
舟碧野朱橋當日事人不見水空流韶華不為少年

留恨悠悠幾時休飛絮落花時節一登樓便做春江都
是泪流不盡許多愁

千秋歲

少游謫處州日作今鄜治
有鶯花亭蓋因此詞取名

水邊沙外城郭春寒退花影亂鶯聲碎飄零酒盞離
別寬衣帶人不見碧雲暮合空相對憶昔西池會鴛
鴦同飛蓋攜手處今誰在日邊清夢斷鏡裏朱顏改春
去也落紅萬點愁如海

踏莎行

東坡絕愛
尾兩句

霧失樓臺月迷津渡桃源望斷無尋處
可堪孤館閉春寒杜鵑聲裏斜陽暮
驛寄梅花魚傳尺素砌成此恨無
重數郴江幸自遠郴山為誰流下瀟湘去

阮郎歸

春晚

退花新綠漸團枝
撲人風絮飛秋千未拆水平堤
落紅成地衣
遊蝶困乳鶯啼
怨春春不知
日長早被酒禁持
那堪更別離

又
旅況

滿天風雨破寒初，深沈庭院虛。
麗譙吹徹小單于，迢迢清夜徂。
鄉夢斷，旅魂孤，崢嶸歲又除。
衡陽猶有鴈傳書，郴陽和鴈無。

南歌子

贈陶心兒

玉漏迢迢盡，銀潢淡淡橫。
夢回宿酒未全醒，已被鄰雞催起怕天明。
臂上粧猶在，襟間泪尚盈。
水邊燈火漸人行，天外一鉤殘月帶三星。

末句益心字也

又

香墨彎彎畫燕脂
淡淡勻揉藍衫子
淡黃裙獨倚玉欄
無語點檀唇
人去空流水
花飛半掩門
亂山何處覓
行雲又是一勾新月照黃昏

菩薩蠻

秋思

蛩聲泣露喧秋枕
羅幃泪濕鴛鴦錦
獨卧玉肌涼
殘更與恨長
陰風翻翠幔
雨濕燈花暗
畢竟不成眠
鴉啼金井寒

畫堂春

春情

東風吹柳日初長
雨餘芳草斜陽杏花零落燕泥香
睡損紅粧香篆暗消鸞鳳畫屏
紫遶瀟湘暮寒輕透薄羅裳
無限思量

又

落紅堆徑水平池
弄晴小雨霏微杏園憔悴杜鵑啼
無奈春歸柳外畫樓獨上
凭欄手撚花枝
放花無語對斜暉
此恨誰知

賀方回

名鑄少為武弁以定力寺一絕見奇於舒王
山谷又賞其詞遂知名當世小詞二卷名東
山寓聲樂府張右史序之

青玉案

山谷稱此詞云解道江南
斷腸句世間只有賀方回

凌波不過橫塘路但目送芳塵去錦瑟年華誰與度月
臺花榭瑣窓朱戶惟有春知處碧雲冉冉蘅皋暮綵
筆新題斷腸句試問閒愁都幾許一川煙草滿城風絮
梅子黃時雨

薄倖 憶故人

淡粧多態更滴滴頻回盼
昧便認得琴心先許欲綰合
歡雙帶記畫堂風月逢迎
輕顰淺笑都無奈待翡翠屏
開芙蓉帳掩羞把香羅暗解
自過了燒燈都不見踏
青挑菜幾回憑雙燕丁寧深
意往來却恨重簾礙知何
時再正春濃酒困人間晝永
無聊賴厭厭睡起猶有花
梢日在

浣溪沙

閨思

樓角紅銷一縷霞淡黃楊柳帶棲鴉玉人和月折梅花
笑撚粉香歸綉戶半垂羅幙護窓紗東風寒似夜來
些

又春愁

閒把琵琶舊譜尋四絃聲怨却沈吟燕飛人靜畫堂陰
欹枕有時成雨夢隔簾無處說春心一從燈夜到如
今

又春事

鸚鵡無言理翠衿
杏花零落畫陰陰
畫橋流水一篙深
芳徑與誰同鬪草
綉床終日罷拈針
小牋香管寫春心

菩薩蠻

閨思

章臺遊冶金龜婿
歸來猶帶醺醺醉
花漏怯春宵
雲屏無限嬌
絳紗燈影背
玉枕釵聲碎
不待宿醒消
馬嘶催早朝

南柯子

別恨

斗酒才供泪扁舟只載愁
畫橋青柳小朱樓猶記出城
車馬為遲留
有恨花空委
無情水自流
河陽新鬢儘
禁秋蕭散楚雲巫雨此生休

望湘人

春思

厭鶯聲到枕花氣動簾醉魂愁夢相半被惜餘黃帶驚
刺眼幾許傷春春晚泪竹痕鮮佩蘭香老湘天濃暖記
小江風月佳時屢約非烟游伴
須信鶯絃易斷奈雲
和再鼓曲終人遠認羅襪無蹤舊處弄波清淺青翰棹

艤白蘋洲畔儘目臨臯飛觀不解寄一字相思幸有歸
來雙燕

感皇恩

記別

蘭芷滿汀洲游絲橫路羅襪塵生步迎顧整鬟顰黛脉
脉多情難語細風吹柳絮人南渡回首舊游山無重
數花底深朱戶何處半黃梅子向晚一簾疎雨斷魂分
付與春歸去

臨江仙

立春

巧翦合歡羅勝子
釵頭春意翩翩艷
歌淺笑拜嫣然願
郎宜此酒行樂駐
華年未至文園多
病客幽襟悽斷
堪憐舊遊夢掛碧
雲邊人歸落鴈後
思發在花前

憶秦娥

春思

曉矇矓前溪百鳥啼
匆匆啼匆匆凌波人
去拜月樓空
舊年今日東門東
鮮粧輝映桃花紅
桃花紅吹開吹
落一任東風

舒信道

名亶為神宗朝御史與李定同陷東坡于罪者

菩薩蠻

此詞極有味

畫船槳鼓催君去
高樓把酒留君住
去住若為情
江頭潮欲平
江潮容易得
却是人南北
今日此樽空
知君何日同

又

冬令

江梅未放枝頭結
江樓已見山頭雪
待得此花開
知君

來未來 風帆雙畫鷁
小雨隨行色空得鬱金裙酒痕
和泪痕

一落索

春

正是看花天氣為春一醉醉來却不帶花歸
銷不解看花意 試問此花明媚將花誰比
只應花好似年年花不似人憔悴

木蘭花令

別意

金絲絡馬青錢路笑指玉皇香案去
點衣柳陌墮殘紅

拂面風橋吹細雨 曉釵壓鬢頭慵舉 恨裏歌聲兼別
苦 西湖一頃白菱花 惆悵行雲無覓處

卜算子

苔

池臺小雨乾 門巷香輪少 誰把青錢襯落紅 滿地無人
掃 何時鬪草歸 幾度尋花了 留得佳人蓮步痕 宮樣
鞋兒小

秦處度

名湛黃山谷嘗稱其詞

卜算子

春情

春透水波明，寒峭花枝瘦。
極目烟中百尺樓，人在樓中否。
四和裏，金鳬雙陸思。
纖手擬倩東風浣，此情情更濃於酒。

李方叔

名豸東坡門下士

虞美人

玉闌干外清江浦，渺渺天涯雨。
好風如扇雨如簾，時見

岸花汀草漲痕添
青林枕上關山路
卧想乘鸞處
碧蕪千里思悠悠
惟有霎時涼夢到南州

清平樂

落梅鳴咽暗淡城頭月
吹滿江天
驚夢蝶喚起畫樓傷別
簾風輕觸銀鈎
梧桐玉露新秋
底事瑣窓深夜素娥常伴人愁

廖世美

好事近

夕景

落日水鎔金天淡暮烟凝碧樓上誰家紅袖靠闌干無力
鴛鴦相對浴紅衣短棹弄長笛驚起一雙飛去聽
波聲拍拍

燭影搖紅

別愁

靄靄春空畫樓森聳凌雲漢紫薇登覽最關情絕妙誇
能賦惆悵相思遲暮記當日朱欄共語塞鴻難問岸柳
何窮別愁紛絮催促年光舊來流水知何處斷腸何
必更殘陽極目傷平楚晚霽波聲帶雨悄無人舟橫古

渡數峰江上芳草天涯參差烟樹

李嬰

滿江紅

元豐中為益水令作
此上東坡坡甚奇之

荆楚風烟寂寞近中秋時候露下冷蘭英將謝葦花初
秀歸燕殷勤辭巷陌鳴蛩淒楚來窓牖又誰念江邊有
神仙飄零久橫琴膝携筇手曠望眼間吟口任紛紛
萬事到頭何有君不見凌煙冠劍客何人氣貌長依舊
歸去來一曲為君吟為君壽

杜安世

名壽域

訴衷情

燒殘絳蠟淚成痕
街鼓報黃昏
碧雲又阻來信
廊上月
侵門
愁永夜拂香裯
待誰溫
夢蘭憔悴
擲果淒涼兩
處銷魂

花菴詞選卷四

欽定四庫全書

花菴詞選卷五

宋 黃昇 撰

宋詞

晁无咎

名補之濟北人

永遇樂

東臯寓居

松菊堂深芰荷池小長夏清暑燕引雛還鳩呼婦往人
靜郊原趣麥天已過薄衣輕扇試起遶園徐步聽衡宇

欣欣童稚共說夜來初雨
蒼苔徑裏紫葳枝上數點

幽花垂露東里催鋤西鄰助餉相戒清晨去斜川歸興
倏然滿目回首帝鄉何處只愁恐輕鞍犯夜霸陵舊路

摸魚兒

幽居真西山絕愛此詞

買陂塘旋栽楊柳依稀淮岸湘浦東臯雨足輕痕漲沙
背鷺來鷗聚堪愛處最好是一川夜月光流渚無人自
舞任翠幕張天柔茵藉地酒盡未能去青綾被休憶
金閨故步儒冠曾把身誤弓刀千騎成何事荒了召平

瓜圃君試覩滿青鏡星星鬢影今如許功名浪語便做
得班超封侯萬里歸計恐遲暮

惜分飛

湖州作

山水光中元無暑是我銷魂別處只有多情雨會人深
意留人住不及梅花來暮未見荷花又去圖畫他年
覩斷腸千古苕溪路

憶少年

送別

無窮官柳無情畫舸無根行客南山尚相送只高城人

隔 罨畫園林溪紺碧算重來盡成陳迹劉郎鬢如此
況桃花顏色

臨江仙

別意

身外閒愁空滿眼就中歡事常稀明年應賦送春詩試
從今夜數相會幾多時 淺酒欲邀誰共歡深情惟有
君知東溪春近好同歸柳垂江上影梅謝雪中枝

洞仙歌

泗州中秋作此
絕筆之詞也

青烟幕處碧海飛金鏡永夜閒階卧桂影露涼時零亂

多少寒螿神京遠惟有藍橋路近
水晶簾不下雲母
屏開冷浸佳人淡脂粉待都將許多明付與金尊投曉
共流霞傾盡更携取胡床上南樓看玉做人間素秋千
頃

晁叔用

感皇恩

寒食

寒食不多時牡丹初賣小院重簾燕飛礙昨宵風雨尚
有一分春在今朝猶自得陰晴快
熟睡起來宿醒微

帶不惜羅襟揜眉黛日長梳洗看看花影移改笑拈雙
杏子連枝戴

又 春情

胡蝶滿西園啼鶯無數水閣橋南路凝佇兩行烟柳吹
落一池風絮秋千斜挂起人何處把酒勸君閒愁莫
訴留取笙歌住休去幾多春色怎禁許多風雨海棠花
謝也君知否

玉胡蝶 春思

目斷江南千里灞橋一望烟水微茫盡鎖重門人去暗
惜流光雨輕輕梨花院落風淡淡楊柳池塘恨偏長佩
沈湘浦雲散高唐清狂重來一夢手搓梅子煮酒新
嘗寂寞經春小橋依舊燕飛忙玉鈎闌凭多漸暖金縷
枕別久猶香最難忘看花南陌待月西廂

傳言玉女

上元

一夜東風吹散柳梢殘雪御樓烟暖對鰲山彩結簫鼓
何晚鳳輦初回宮闕千門燈火九衢風月綉閣人人

乍嬉遊困又歇艷粧初試把珠簾半揭嬌波溜人手撚
玉梅低說相逢長是上元時節

如夢令

春情

牆外轆轤金井驚夢曹騰初省深院閉斜陽燕入陰陰
簾影人靜人靜花落鳥啼風定

張子野

名先乃宋子京稱為雲破月來花弄影郎中
者也

天仙子

春恨

水調數聲持酒聽
午醉醒來愁未醒
送春春去幾時回
臨晚鏡傷流景
往事悠悠空記省
沙上竝禽池上暝
雲破月來花弄影
重重翠幙密遮燈
風不定人初靜
明日落紅應滿徑

醉落魄

美人吹笛

雲輕柳弱內家髻
子新梳掠
生香真色人難學
橫筦孤吹月淡天垂幕
朱唇淺破櫻桃萼
倚樓人在闌干角

夜寒指冷羅衣薄，聲入霜林款款飛。梅落

浣溪沙

江景

樓倚江邊百尺高，烟中還未見歸橈。幾時期信似春潮。
花片片飛風弄蝶，柳陰陰下水平橋。日長才過又今宵。

青門引

春思

乍暖還輕冷，風雨晚來方定。庭軒寂寞近清明，殘花中
酒。又是去年病。樓頭畫角風吹醒。入夜重門靜。那堪

更被明月隔牆送過秋千影

滿江紅

初春

飄盡寒梅笑粉蝶遊蜂未覺漸迤邐水明山秀暖生簾
幕過雨小桃紅未透舞烟新柳青猶弱記畫橋深處水
邊亭曾偷約多少恨今猶昨愁和悶都忘却拚從前
爛醉被花迷着晴鴿試鈴風力軟雛鶯弄古春寒薄但
只愁錦繡闌榭時東風惡

行香子

美人

舞雪歌雲間淡粧勻藍溪水深染輕裙酒香熏臉粉色
生春更巧談話美情性好精神空江無伴凌波何處
月橋邊青柳朱門斷鐘殘角又送黃昏奈心中事眼中
淚意中人

清平樂

未二句最工

清歌逐酒醉臉鮮霞透櫻小杏青寒食後衣換縷金輕
綉畫堂新月朱扉嚴城夜鼓歸遲細看玉人粧面春
工不在花枝

李元膺

洞仙歌

一年春物惟梅柳間意味最深至鶯花爛漫時則春已衰遲使人無復新意予

作洞仙歌使探春者歌之無後時之悔

雪雲散盡放曉晴庭院楊柳於人便青眼更風流多處
一點梅心相映遠約略嚙輕笑淺一年春好處不在
濃芳小艷疎香最嬌軟到清明時候百紫千紅花正亂
已失春風一半蚤占取韶光共追遊但莫管春寒醉紅
自暖

又雨

廉纖細雨帶東風如困縈斷千絲為誰恨向楚宮一夢
多少悲涼無處問愁到而今未盡分明都是汨泣柳
沾花常與騷人伴孤悶記當年得意處酒力方酣怯輕
寒玉爐香潤又豈識情懷苦難禁對點滴簷聲夜寒燈
暈

茶瓶兒

悼亡

去年相逢深院宇海棠下曾歌金縷歌罷花如雨翠羅

衫上點點紅無數
今歲重尋攜手處
空物是人非春
暮回首青門路
亂紅飛絮相逐東風去

鷓鴣天

春情

寂寞秋千兩綉旗
日長花影轉堦遲
燕驚午夢周遮語
蝶困春遊落托飛
思往事入顰眉
柳梢陰重又當時
薄情風絮難拘束
飛過東牆不肯歸

王通叟

名觀著有冠柳集序者稱其高於柳詞故曰

冠柳至於踏青一詞又不獨冠柳詞之上也
踏青詞即慶清朝慢今載于首

慶清朝慢

踏青

調雨為酥催冰做水東君分付春還何人便將輕暖點
破殘寒結伴踏青去好平頭鞋子小雙鸞煙郊外望中
秀色如有無間晴則箇陰則箇餽飭得天氣有許多
般須教鏤花撥柳爭要先看不道吳綾綉襪香泥斜沁
幾行斑東風巧盡收翠綠吹在眉山

風流楚楚詞林中
之佳公子也世謂

柳耆卿工為浮艷之詞方之此
作蔑矣詞名冠柳豈偶然哉

清平樂

擬太白應制

黃金殿裏燭影雙龍戲
勸得官家真箇醉進酒猶呼萬
歲美人舞徹梁州天恩與整搔頭
一夜御前宣住六
宮多少人愁

又 同前

宜春小苑處處花開滿
學得紅粧紅要淺催上金車要
看君王曲宴瑤池小舟掠水如
飛奪得錦標歸去匆

金
卷五
五
忽不惜羅衣

雨中花令

呈元厚之

百尺清泉聲陸續，映瀟灑碧梧翠竹。面千步回廊，重重
簾幕。小枕欹寒玉。試展鮫綃看畫軸。見一派瀟湘凝
綠。待玉漏穿花，銀河垂地，月上闌干曲。

木蘭花令

柳

銅駝陌上新正後，第一風流除是柳。勾牽春事不如梅，
斷送離人強似酒。東君有意偏攪就，慣得腰肢真箇

瘦阿誰道你不思量因甚眉頭長恁皺

生查子

關山魂夢長塞鴈音書少兩鬢可憐青一夜相思老
歸傍碧紗窓說與人人道真箇別離難不似相逢好

卜算子

送鮑浩然之湘東

水是眼波橫山是眉峯聚欲問行人去那邊
眉眼盈盈處才始送春歸又送君歸去
若到江南趕上春千萬和春住

菩薩蠻

歸思

單于吹落山頭月
漫漫江上沙如雪
誰唱縷金衣
水寒船舫稀
蘆花楓葉浦
憶抱琵琶語
身未發長沙
夢魂先到家

江城梅花引

年年江上見寒梅
暗香來為誰
開疑是月宮仙子下瑤臺
冷艷一枝春在手
故人遠相思
寄與誰
怨極恨極
嗅香藥念此情家
萬里暮霞散綺
楚天碧片片輕飛為

我多情特地點征衣
花易飄零人易老
正心碎那堪寒管吹

田不伐

工於樂府

南柯子

春景

夢怕愁時斷
春從醉裏回
悽涼懷抱向誰開
些子清明時候
被鶯催
柳外都成絮
闌邊半是苔
多情簾燕獨徘徊
依舊滿身花雨
又歸來

又 春思

團玉梅梢重香羅
芝扇低簾風不動
蝶交飛一樣綠陰
庭院鎖斜暉
對月懷歌扇因風
念舞衣何須惆悵惜
芳菲拚却一年
憔悴待春歸

汪正夫

名輔之

行香子

記恨

晚綠寒紅芳意匆匆
惜年華今與誰同
碧雲零落數字

賓鴻看渚蓮凋宮扇舊怨秋風
流波墜葉佳期何在
想天教離恨無窮試將前事閒倚梧桐有銷魂處明月
夜錦屏空

趙承之

名鼎臣仕宣和中自開封少尹除少蓬以右
文撰除知鄧州召為太府卿卒贈待制

念奴嬌

送王長卿赴
河間司錄

舊遊何處記金湯形勝蓬瀛佳麗綠水芙蓉元帥與賓

僚風流濟濟萬柳亭邊雅歌堂上醉倒春風裏十年一
夢覺來烟水千里惆悵送子重遊南樓依舊否朱闌
誰倚要識當時惟是有明月曾陪珠履量減盃中雪添
頭上甚矣吾衰矣酒徒相問為言憔悴如此

章質夫

名案

水龍吟

柳花

燕忙鶯懶花殘正堤上柳花飄墜輕飛點畫青林誰道

全無才思閒趁游絲靜臨深院日長門閉傍珠簾散漫
垂垂欲下依前被風扶起蘭帳玉人睡覺怪春衣雪

霑瓊綴綉床漸滿香毬無數才圓却碎時見蜂兒仰粘
輕粉魚吞池水望章臺路杳金鞍遊蕩有盈盈泪

傍珠簾散

漫數語形容盡矣

劉仲方

六州歌頭

項羽廟

秦亡草昧劉項起吞并驅龍虎鞭寰宇斬長鯨掃攬搶

血染彭門戰視餘耳皆鷹犬平禍亂歸炎漢勢奔傾兵
散月明風急旌旗亂刀斗三更命虞姬相對泣聽楚歌
聲玉帳魂驚 泪盈盈恨花無主凝愁緒揮雪刃掩泉
扃時不利騅不逝困陰陵叱追兵暗鳴摧天地望歸路
忍偷生功蓋世成間紀建遺靈江靜水寒烟冷波紋細
古木凋零遣行人到此追念痛傷情勝負難憑

水調歌頭

落日塞垣路風勁憂貂裘翩翩數騎閒獵深入黑山頭

極目平沙千里惟見凋弓白羽鐵面駭驂騶隱隱望青
冢特地起閒愁 漢天子方鼎盛四百州玉顏皓齒深
鎖三十六宮秋堂有經綸賢相邊有縱橫謀將不作翠
蛾羞窳宇和樂也聖主永無憂

聶冠卿

多麗

想人生美景良辰堪惜向其間賞心樂事古來難是并
得況東城鳳臺沁苑泛晴波淺照金碧露洗華桐煙霏

絲柳綠陰搖曳蕩春一色畫堂迥玉簪瓊珮高會盡詞

客

一本於此分段

清歡久重然絳蠟別就瑤席

有翩若輕鴻

體態暮為行雨標格逞朱唇緩歌妖麗似聽流鶯亂花

隔慢舞縈回嬌鬟低彈腰肢纖細困無力忍分散彩雲

歸後何處更尋覓休辭醉明月好花莫謾輕擲

冠卿之詞不多

見如此篇亦可謂才情富麗矣其露洗華桐四句又所謂玉中之拱璧珠中之夜光每一觀之撫玩無斁

柳耆卿

名永長於纖艷之詞然多近俚俗故市井之

人悅之今取其尤佳者

醉蓬萊

慶老人星現

漸亭臯葉下隴首雲飛素秋新霽華闕中天鎖葱葱佳
氣嫩菊黃深拒霜紅淺近寶階香砌玉宇無塵金莖有
露碧天如水 正直昇平萬機多暇夜色澄鮮漏聲迢

遞南極星中有老人呈瑞此際宸遊鳳輦何處度管絃

聲脆太液波翻披香簾捲月明風細

永為屯田員外郎
會太史奏老人星

見時秋霽宴禁中仁宗命左右詞臣為樂章內侍屬柳應
制柳方冀用作此詞奏呈上見首有漸字也若不憚請至

欽定四庫全書

宸遊鳳輦何處乃與御製真宗挽詞暗合上慘然又讀
至太液波翻曰何不言波澄投之於地自此不復擢用

滿江紅

桐川

暮雨初收長江靜征帆夜落臨島嶼蓼烟疎淡葦風蕭
索幾許漁人橫短艇盡將燈火歸村郭遣行客到此念
回程傷漂泊 桐江好煙漠漠波似染山如削遶嚴陵
灘畔鷺飛魚躍游宦區區成底事平生況有林泉約歸

去來一曲仲宣樓從軍樂

換頭數
語最工

木蘭花慢

清明

拆桐花爛漫乍疎雨洗清明正艷杏燒林絳桃綉野芳
景如屏傾城盡尋勝賞驟雕鞍紺幃出郊坰風暖繁絃
脆管萬家競奏新聲盈盈鬪草踏青人艷冶逋逢迎
向路傍往往遺簪墮珥珠翠縱橫歡情對佳麗地任金
罍罄竭玉山傾拚却明朝永日畫堂一枕春醒

玉胡蝶

春遊

漸覺東郊明媚夜來膏雨一洒塵埃滿目淺桃深杏露
染烟裁銀塘靜魚鱗簾展煙岫翠龜甲屏開殷晴雷雲

中鼓吹遊徧蓬萊
徘徊隼旟前後三千珠履十二金
釵雅俗熙熙下車成宴盡春臺好雍容東山妓女堪笑
傲北海樽壘且追陪鳳池歸去那更重來

又 秋思

望處雨收雲斷凭欄悄悄目送秋光晚景蕭疎堪動宋
玉悲涼水風輕蘋花漸老月露冷梧葉飄黃遣情傷故
人何在煙水茫茫
難忘文期酒會幾辜風月屢變星
霜海闊山遙未知何處是瀟湘念雙燕難憑遠信指暮

天空識歸航黯相望斷鴻聲裏立盡斜陽

雨零鈴

秋別

寒蟬淒切對長亭晚驟雨初歇都門帳飲無緒方留戀
處蘭舟催發執手相看淚眼竟無語凝噎念去去千里
烟波暮靄沈沈楚天濶多情自古傷離別更那堪冷落
清秋節今宵酒醒何處楊柳岸曉風殘月此去經年
應是良辰好景虛設便縱有千種風流待與何人說

二郎神

七夕

炎光謝過暮雨芳塵輕洒乍露冷風清庭戶爽天如水
玉鉤遙掛應是星娥嗟久阻叙舊約飈輪欲駕極目處
微雲暗度耿耿銀河高瀉閒雅須知此景古今無價
運巧思穿針樓上女擡粉面雲鬟相亞鈿合金釵私語
處算誰在回廊影下願天上人間占得歡娛年年今夜

柳腰輕

贈妓

英英妙舞腰肢軟章臺柳昭陽燕錦衣冠蓋綺堂筵宴
是處千金爭選顧香砌絲管初調倚輕風珮環微顫

乍入霓裳促遍逞盈盈漸催檀板慢垂霞袖急趨蓮步
進退奇容千變算何止傾國傾城暫回眸萬人腸斷

晝夜樂

贈妓

秀香家住桃花徑算神仙才堪竝層波細翦明眸膩玉
圓搓素頸愛把歌喉當筵逞過天邊亂雲愁凝言語似
嬌鶯一聲聲堪聽洞房飲散簾幃靜擁香衾歡心稱
金爐麝裏青煙鳳帳燭搖紅影無限狂心乘酒興這歡
娛漸入佳境猶自怨鄰難道秋宵不永

此詞麗以淫不當入選以東坡

嘗引用其
語故錄之

甘草子

秋暮亂洒衰荷顆顆真珠雨雨過月華生冷徹鴛鴦浦
池上凭闌無語奈此箇單悽情緒却傍金籠教鸚鵡
念粉郎言語

少年遊

長安古道馬遲遲高柳亂蟬嘶夕陽島外秋風江上目
斷四天垂歸雲一去無蹤跡何處是前期狎興生疎

酒徒蕭索不似少年時

鄭毅夫

名獬在仁宗朝舉進士第一

好事近

初春

江上探春回正值早梅時節兩行小槽雙鳳按涼州初
徹謝娘扶下綉鞍來紅靴踏殘雪歸去不須銀燭有
山頭明月

花菴詞選卷五

欽定四庫全書

花菴詞選卷六

宋 黃昇 撰

宋詞

趙德麟

名令時東坡之友襲封安定郡王

清平樂

春情

春風依舊著意隋堤柳
搓得鵝兒黃欲就
天氣清明
去年紫陌青門
今宵雨魄雲魂
斷送一生憔悴
能

消幾箇黃昏

蝶戀花

清明

欲減羅衣寒未去不捲珠簾人在深深處紅杏枝頭花
幾許啼痕止恨清明雨盡日水沈香一縷宿酒醒遲
惱破春情緒飛燕又將歸信誤小屏風上西江路

又
春恨

卷絮風頭寒欲盡墜粉飄香日日紅成陣新酒又添宿
酒困今春不減前春恨蝶去鶯來無處問隔水盈盈

望斷雙魚信惱亂橫波秋一寸斜陽只與黃昏近

天仙子

春情

宿雨洗空臺榭瑩下盡珠簾寒未定花開花落幾番晴
春欲竟愁未醒池面杏花紅透影一紙短書言不盡
明月清風還記省玉樓香斷又添香閒展興臨好景心
似亂萍何處整

浣溪沙

風急花飛晝掩門一簾疎雨滴黃昏便無離恨也銷魂

翠被任熏終不暖玉盃慵舉幾番溫
這般情事與誰論

思越人

素玉朝來有好懷一枝梅粉照人開
晴雲欲向盃中起
春色先從臉上來
深院落小樓臺玉盤香篆看徘徊
須知月色撩人恨數夜春寒不下堦

又
情景

可是相逢意便深為郎巧笑不須金
門前一尺春風髻

窓內三更夜雨衾
情渺渺信沈沈
青鸞無路寄芳音
山城鐘鼓愁難聽
不解襄王夢裏尋

烏夜啼

春思

樓上縈簾弱絮牆頭礙月低
花年年春事關心事腸斷
欲棲鴉舞鏡鸞余翠減啼珠鳳
蠟紅斜重門不鎖相思
夢隨意遠天涯

虞美人

春恨

畫船穩泛春江渺
夕雨寒聲小
紫烟深處數峯橫
驚起

一灘鷗鷺照人明 玉樓今夜歸期誤恨入闌干暮可
堪春事滿春懷不似珠簾新燕早歸來

蔡子正

名挺為神宗朝樞密諡敏肅

喜遷鶯

元豐間公自西掖出鎮平陽府經數歲
意欲歸作此詞詞播中都遂徹聖聽上

因語呂丞相曰蔡挺
欲歸遂以西掖召還

霜天秋曉正紫塞故壘黃雲衰草漢馬嘶風邊鴻叫月
隴上鐵衣寒早劍歌騎曲悲壯盡道君恩須報塞垣樂

盡索韃錦領山西年少
談笑刁斗靜烽火一把時報
平安耗聖主憂邊威懷遐遠
強敵尚寬天討歲華向晚
愁思誰念玉關人老太平也
且歡娛莫惜金尊頻倒

阮閱休

名閱有詩話總龜行于世曾守袁州

眼兒媚

離情

樓上黃昏杏花寒斜月小
闌干一雙燕子兩行征鴈畫
角聲殘綺窓人在東風裏
洒泪對春閒也應似舊盈

盈秋水淡淡青山

閑休小詞惟有此篇見于世英妙傑特所謂百不為多一不為少

毛澤民

名雱有東堂集十卷

惜分飛

元祐中東坡守錢塘澤民為法曹掾狹滿辭去是夕晏客有妓歌此詞坡問誰

所作妓以毛法曹對坡語坐客曰郡寮有詞人不及知某之罪也翌日折蘭追

還畱連數月澤民因此得名

泪濕闌干花著露愁到眉峯碧聚此恨平分取更無言

語空相覩 斷雨殘雲無意緒寂寞朝朝暮暮今夜山

深處斷魂分付潮回去

玉樓春

立春

小園半夜東風轉吹皺冰池雲母面曉披閭闔見朝陽
知向碧堦添幾線小烟弄柳晴先暖殘雪禁梅香尚
淺殷勤洗拂舊東君多少韶華都借看

相見懽

秋思

十年湖海扁舟幾多愁白髮青燈今夜不宜秋中庭
樹空堦雨思悠悠寂寞一生心事五更頭

西江月

春夕

烟雨半藏楊柳風光初著桃花玉人細細酌流霞醉裏
將春留下 柳外鴛鴦作伴花邊胡蝶為家醉翁醉裏
也隨他月在柳橋花榭

青玉案

秋思

芙蓉花上濛濛雨又冷落池塘暮何處風來搖碧樹捲
簾凝望淡烟衰柳翡翠穿花去 玉京人去無由駐忍
獨在凭闌處試問綠窓秋到否可人今夜新涼一枕無

計相分付

謝無逸

名逸臨川進士自號溪堂

蝶廳花

春景

荳蔻梢頭春色淺
新試紗衣拂袖東風軟
紅日三竿簾幕卷
畫樓影裏雙飛燕
攏鬢步搖青玉碾
缺樣花枝葉葉蜂兒顫
獨倚闌干凝望遠
一川烟草平如翦

踏莎行

春思

柳絮風輕梨花雨細春陰院落簾垂地碧溪影裏小橋橫青帘市上孤烟起鏡約關情琴心破睡輕寒漠漠侵鴛被酒醒霞散臉邊紅夢回山蹙眉峯翠

南歌子

春夜

雨洗溪光淨風掀柳帶斜畫樓朱戶玉人家簾外一眉新月浸梨花金鴨香凝袖銅荷燭映紗鳳盤宮錦小屏遮夜靜寒生春笋理琵琶

減字木蘭花

七夕

荷花風細乞巧樓中涼似水天幕低垂新月彎環淺暈
眉橋橫烏鵲不負年年雲外約殘角疎鐘腸斷朝霞
一縷紅

漁家傲

漁父

秋水無痕清見底蓼花汀上西風起一葉小舟烟霧裏
蘭棹艤柳條帶雨穿雙鯉自歎直鉤無處使笛聲吹
散雲山翠鱸落霜刀紅縷細新美酒醉來獨枕蓑衣睡

驀山溪

月夜

霜清木落深院簾櫳靜池面捲輕波瑩香水一奩明鏡
脩筠拂檻疎翠挽嬋娟山霧歛水雲收野闊江天迥
紅消醉玉酒面風前醒羅幕護輕寒錦屏空金爐燼冷
星橫參昴梅徑月黃昏清夢覺淺眉顰窓外橫斜影

玉樓春

寒食

弄晴數點梨梢雨門外畫橋寒食路杜鵑飛破草間烟
蛺蝶惹殘花底霧東君着意憐樊素一段韶華都付
與粧成不管露桃嗔舞罷從教風柳妬

南鄉子

美人

淺色染春衣。衣上雙雙小鴈飛。
袖捲藕絲寒玉瘦。彈碁贏得尊前酒一卮。
冰雪拂胭脂。絳牕香融落日西。唱徹陽關人欲去。
依依醉眼橫波翠黛低。

江神子

別情

一江秋水碧灣灣。繞青山。玉連環。
簾幕低垂人在畫圖間。
閒閒抱琵琶尋舊曲。彈未了。意闌珊。
飛鴻數點拂雲端。
倚闌看楚天。寒擬倩春風吹夢到長安。
恰似梨花春

欽定四庫全書

花卷詞選
卷六

帶雨愁滿眼，淚闌干。

又 春思

杏花村館酒旗風，水溶溶、颺殘紅。
野渡舟橫，楊柳綠陰，濃望斷江南山色。
遠人不見，草連空。夕陽樓外晚烟。
籠粉香融，淡眉峯記得年時相見。
畫屏中只有關山，今夜月千里外素光同。

千秋歲

夏景

練花飄砌，蔌蔌清香細。
梅雨過，蘋風起，情隨湘水遠，夢

遶吳峯翠琴書倦鷓鴣喚起南窓睡
密意無人寄幽恨憑誰洗
脩竹畔疎簾裏歌餘塵拂扇舞罷風掀袂
人散後一鉤淡月天如水

如夢令

花落鶯啼春暮陌上綠楊飛絮
金鴨晚香寒人在洞房
深處無語無語葉上數聲疎雨

清平樂

春情

花邊柳際已漸知春意
歸信不知何日是
舊恨欲拚無

欽定四庫全書

花庵詩選
卷六

計 故人零落西東題詩待倩歸鴻不似多情芳草年
年處處相逢

謝幼槃

名邁自號竹友無逸之弟

醉蓬萊

中秋懷無逸兄

望晴峯染黛暮靄澄空碧天無漢圓鏡高飛又一年秋
半皓色誰同歸心暗折聽唳雲孤鴈問月停盃錦袍何
處一尊無伴 好在南鄰詩盟酒社刻燭爭成引觴愁

緩今夕樓中繼阿連清玩飲劇狂歌歌終起舞醉冷光
零亂樂事難窮疎星易曉又成浩歎

江神子

美人

破瓜年紀柳腰身懶精神帶羞嗔手把江梅冰雪鬪清
新不向鴉兒飛處着留乞與眼中人水精船裏酒鱗
鱗皺香茵駐行雲舞罷歌餘花困不勝春問着些兒心
底事才靨笑又眉顰

減字木蘭花

贈茶妓宋瑤

欽定四庫全書

卷六

風簾度曲倦倚銀屏初睡足清簾疎簾金鴨香消懶更添
纖纖露玉風電縱橫飛鈿局顰歛雙蛾凝竚無言
密意多

陳瑩中

名瓘延平人號了翁

青玉案

雪

碧空黯淡同雲繞漸枕上風聲峭明透紗窓天欲曉珠
簾才捲美人驚報一夜青山老使君命客金尊倒正

十里瓊瑤未經掃
歆壓江梅春信早
十分農事滿城和
氣管取來年好

滿庭芳

離情

淮葉繽紛江烟濃淡
別樽同倒寒暉未逢
春信霜露惹
征衣往事元無是處
何須待回首知非
春鶻語從來勸
我常道不如歸
家山何處近
江樓簾棟夕捲朝飛
問西江筍蕨何似
鱸肥且置華胥舊夢
忘言處千古同時
君知我平生心事
相契古來稀

欽定四庫全書

花萼詩選
卷六

臨江仙

贈別

聞道洛陽花正好
家庭戶春風道人飲散百壺空
年年花下醉開謝
幾番紅
此別又從何處去
風萍一任西東
語聲雖異笑聲同一輪
深夜月何處不相逢

徐師川

名俯號東湖山谷之甥

卜算子

春愁

天生百種愁
掛在斜陽樹
綠葉陰陰占得春
草滿鶯啼

處 不見凌波步空憶如簧語柳外重重疊疊山遮不
斷愁來路

鷓鴣天

漁父

七澤三湘碧草連洞庭秋到水如天朝廷若覓玄真子
不在雲邊即酒邊 明月棹夕陽船鱸魚恰似鏡中懸
絲綸釣餌都收盡八字山前聽雨眠

王履道

名安中受知於蔡元長有文章盛名號初寮

先生

蝶戀花

迎春花

雪霏花梢春欲到殘顰迎春一夜花開早青帝回輿雲
縹緲鮮鮮金雀來飛繞 綉閣紗窓人窈窕翠樓紅絲
鬪翦幡兒小戴在花枝爭笑道願人長共春難老

洞仙歌

情景

深庭夜寂但涼蟾如畫鵲起高槐露華透聽西樓玉筩
吹徹伊州金釧響軋軋朱扉暗扣 迎人巧笑道好箇

今宵怎不相尋暫携手見淡淨晚粧殘對月偏宜多情
更越饒纖瘦早促分飛霎時休便恰似陽臺夢雲歸後

一落索

送楊伯紹帥慶陽

塞柳未傳春信霜花侵鬢送君西去指秦關看日近長
安近玉帳同時英俊合離無定路逢新鴈北飛來寄
一字燕山問

清平樂

春宴

花時微雨未減春分數占取簾疎花密處把酒聽歌金

縷斜風輕度濃香間情正與春長向晚紅燈入座嘗
新春杏催觴

玉樓春

春情

飛鴻只向秦箏住終寄青樓書不去手因春夢有携時
眼到花梢無著處泥金小字回文句翠袖紅裙知在
否欲尋巫峽舊時雲看取高唐臺畔路

小冲山

夜晏

椽燭垂珠清漏長酒黏衫袖濕有餘香紅牙雙捧旋排

行將歌處相向更勾粧
明月映東牆海棠花逕密迸
流光遲留春筍緩催觴菊堂靜人已候虛廊

蝶戀花

千古銅臺今莫問流水浮雲歌舞西陵近
烟柳有情看不盡東風約定年年信
天與麟符行樂分緩帶輕裘
雅晏催雲鬢翠霧縈紆銷篆印
箏聲恰度秋鴻陣

李世英

名冠山東人

蝶戀花

春暮

遙夜亭皋閒信步才過清明漸覺傷春暮
數點雨聲風約住朦朧淡月雲來去
桃杏依稀香暗度誰在秋千
笑裏輕輕語一寸相思千萬緒
人間沒箇安排處

六州歌頭

驪山

淒涼綉嶺宮殿倚山阿
明皇帝曾遊地鎖烟蘿
鬱嵯峨憶昔真妃子
艷傾國方姝麗
朝復暮嬪嬌妬寵偏頗
三尺玉泉新浴蓮羞吐
紅浸秋波聽花奴敲羯鼓
酣奏鳴

鼉體不勝羅舞婆娑 正霓裳曳驚烽燧千萬騎擁珎
戈情宛轉魂空亂蹙雙蛾奈兵何痛惜三春暮委妖麗
馬嵬坡平寇亂回宸輦忍重過香瘞紫囊猶有鴻都客
鈿合應訛使行人到此千古只傷歌事往愁多

葉道卿

名清臣

賀聖朝

留別

滿斟綠醕留君住莫匆匆歸去三分春色二分愁更一

分風雨 花開花謝都來幾許且高歌休訴不知來歲
牡丹時再相逢何處

沈公述

念奴嬌

春恨

杏花過雨漸殘紅零落胭脂顏色流水飄香人漸遠難
託春心脉脉恨別王孫牆陰目斷手把青梅摘金鞍何
處綠楊依舊南陌 消散雲雨須臾多情因甚有輕離
輕拆燕語千般爭解說些子伊家消息厚約深盟除非

重見了方端的而今無奈寸腸千恨堆積

望海潮

上太原知府王君貺尚書

山光凝翠川容如畫名都自古并州簫鼓沸天弓刀似
水連營十萬貔貅金騎走長楸少年人一一錦帶吳鉤
路入榆關鴈飛汾水正宜秋追思昔日風流有儒將
醉吟才子狂遊松偃舊亭城高故國空如舞榭歌樓方
面倚賢侯便恐為霖雨歸去難留好向西溪恣攜絃管

燕蘭舟

公述此詞典雅有味而今世但傳其杏花過雨之曲真所謂吾未見好德如好色者也

楊時可

名适棣州人年十八登第未肯出仕從陳后
山學詩晚為尚書比部外郎

南柯子

送淮漕向伯恭

怨草迷南浦
愁花傍短亭
有情歌酒莫催行
看取無情
花草也關情
舊日臨歧曲
而今忍淚聽淮山
何在暮
雲凝待倩春風
吹夢過江城

蔣元龍

名子雲

好事近

春晚

葉暗乳鴉啼風定亂紅猶落胡蝶不隨春去入薰風池
閣休歌金縷勸金卮酒病煞如昨簾捲日長人靜任
楊花飄泊

阮郎歸

春雨

小池芳草綠初勻柳寒眉尚顰東風吹雨細於塵一庭
花臉皺鶯共蝶怨還嗔眼前無好春這般天氣殺愁

人人愁旋旋新

烏夜啼

春

小桃落盡殘紅夜來風又是一番春事不從容
翠屏掩芳信斷轉愁濃可惜日長閒暇小簾櫳



花菴詞選卷六

欽定四庫全書

集部

花菴詞選卷七至十

詳校官 編修 臣 周瓊

侍讀 臣 孫球覆勘

總校官 知縣 臣 繆 琪

校對官 中書 臣 宋枋遠

謄錄監生 臣 王利用

欽定四庫全書

花菴詞選卷七

宋 黃昇 撰

宋詞

周美成

名邦彥初進汴都賦得官徽廟時提舉大晟
樂府官至待制詞名清真詩餘

瑞龍吟

春詞

章臺路還見褪粉梅梢試花桃樹惜惜坊陌人家定巢

燕子歸來舊處 黯凝佇因記箇人癡小乍窺門戶侵
晨淺約宮黃障風映袖盈盈笑語 前度劉郎重到訪
鄰尋里同時歌舞惟有舊家秋娘聲價如故吟牋賦筆
猶記燕臺句知誰伴名園露飲東城間步事與孤鴻去
探春盡是傷離意緒官柳低金縷歸騎晚纖纖池塘飛
雨斷腸院落一簾風絮 今按此詞自章臺路至歸來舊處是第一段自黯凝佇至盈盈
笑語是第二段此謂之雙拽頭屬正平調自前度劉郎以下即犯大石係第三段至歸騎晚以下四句再歸正
平今諸本皆於吟牋賦筆處分段者非也

蘭陵王

柳

柳陰直烟裏絲絲弄碧隋堤上曾見幾番拂水飄綿送
行色登臨望故國誰識京華倦客長亭路年去歲來應
折柔條過千尺閒尋舊蹤跡又酒趁哀絃燈照離席
梨花榆火催寒食愁一箭風快半篙波暖回頭迢遞便
數驛望人在天北悽惻恨堆積漸別浦縈迴津堠岑
寂斜陽冉冉春無極記月榭攜手露橋聞笛沈思前事
似夢裏泪暗滴

隔浦蓮近

夏景

新篁搖動翠葆曲徑通深窈夏果收新脆金丸落驚飛
鳥濃靄迷岸草蛙聲鬧驟雨鳴池沼水亭小浮萍破
處簾花簷影顛倒綸巾羽扇困卧北窓清曉屏裏吳山
夢自到驚覺依然身在江表

西河

金陵懷古

佳麗地南朝盛事誰記山圍故國遠清江髻鬟對起怒
濤寂寞打空城風檣遙度天際斷岸樹猶倒倚莫愁

艇子曾繫空餘舊迹鬱蒼蒼霧沈半壘夜深月過女牆
來傷心東望淮水酒旗戲鼓甚處市想依稀王謝鄰
里燕子不知何世向尋常巷陌人家相對如說興亡斜
陽裏

解連環

怨別

怨懷難託嗟情人斷絕信音遼邈縱妙手能解連環似
風散雨收霧輕雲薄燕子樓空暗塵鎖一床絃索想移
根換葉盡是舊時手種紅葉汀洲漸生杜若料舟移

岸曲人在天角謾記得當日音書把閒語閒言待總燒
却水驛春回望寄我江南梅萼拚今生對花對酒為伊
汨落

風流子

初夏

新綠小池塘風簾動碎影舞斜陽羨金屋去來舊時巢
燕土花繚繞前度莓牆綉閣鳳幃深幾許聽得理絲簧
欲說又休慮乖芳信未歌先咽愁近清觴 遙知新粧
了開朱戶應自待月西廂最苦夢魂今宵不到伊行問

甚時說與佳音密耗寄將秦鏡偷換韓香天使教人霎
時廝見何妨

又 秋詞

楓林凋晚葉關河迴楚客慘將歸望一川暝靄鴈聲哀
怨半規涼月人影參差酒醒後泪花銷鳳蠟風幙卷金
泥砧杵韻高喚回殘夢綺羅香減牽起餘悲 亭高分
襟地難拚處偏是掩面牽衣何況怨懷長結重見無期
想寄恨書中銀鈎空滿斷腸聲裏玉筯偷垂多少暗愁

密意惟有天知

花犯

梅花

粉牆低梅花照眼依然舊風味露痕輕綴疑淨洗鉛華
無恨清麗去年勝賞曾孤倚冰盤同宴喜更可惜雪中
高樹香篝熏素被今年對花太匆匆相逢似有限依
依愁悴凝望久青苔上旋看飛墜相將見脆圓薦酒人
正在空江烟浪裏但夢想一枝瀟灑黃昏斜照水

此只詠梅

花而紆餘反覆道盡三年間事昔人謂
好詩圓美流轉如彈丸余於此詞亦云

意難忘

美人

衣染鶯黃愛停歌駐拍勸酒持觴低鬟蟬影動私語口
脂香荷露滴竹風涼捫劇飲淋浪夜漸深籠燈就月細
與端相知音見說無雙解移宮換羽未怕周郎長顰
知有恨貪耍不成粧些箇事惱人腸待說與何妨又恐
伊尋消問息瘦減容光

側犯

荷花

暮霞霽雨小蓮出水紅粧靚風定看步襪江妃照明鏡

飛螢度暗草秉燭遊花徑人靜携艷質追涼就槐影
金環皓腕雪藕清泉瑩誰念省滿身香猶是舊荀令見
說胡姬酒壚寂靜烟鎖漠漠藻池苔井

蝶戀花

早行

月皎驚鳥棲不定更漏將闌轆轤牽金井喚起兩眸清
炯炯淚花落枕紅綿冷執手霜風吹鬢影去意徊徨
別語愁難聽樓上闌干橫斗柄露寒人遠雞相應

齊天樂

秋詞

綠蕪凋盡臺城路殊鄉又逢秋晚暮雨生寒鳴蛩勸織
深閣時聞裁剪雲窓靜掩嘆重拂羅裯頓疎花簾尚有
練囊露螢清夜照書卷荆江留滯最久故人相望處
離思何限渭水西風長安亂葉空憶詩情宛轉凭高眺
遠正玉液新蕩蟹螯初薦醉倒山翁但愁斜照斂

滿庭芳

夏景

風老鶯雛雨肥梅子午陰嘉樹清圓地卑山近衣潤費
爐烟人靜烏鳶自樂小橋外新綠濺濺凭闌久黃蘆苦

竹疑泛九江船 年年如社燕漂流瀚海來寄脩椽且
莫思身外長近尊前憔悴江南倦客不堪聽急管繁絃
歌筵畔先安簟枕容我醉時眠

渡江雲

春詞

晴嵐低楚甸暖回鴈翼陣勢起平沙驟驚春在眼借問
何時委曲到山家塗香暈色盛粉飾爭作妍華千萬絲
陌頭楊柳漸漸可藏鴉堪嗟清江東注畫舸西流指
長安日下愁宴闌風翻旗尾潮濺烏紗今宵正對初弦

月傍水驛深艤兼葭沈恨處時時自剔燈花

過秦樓

夜景

水浴清蟾葉喧涼吹巷陌馬聲初斷閒依露井笑撲流
螢惹破畫羅輕扇人靜夜久凭闌愁不歸眠立殘更箭
嘆年華一瞬人今千里夢沈書遠空見說鬢怯瓊梳
容銷金鏡漸懶起時勻染梅風地溽梧雨苔滋一架舞
紅都變誰信無繆為伊才減江淹情傷荀倩但明河影
下遙看稀星數點

解蹀躞

秋詞

候館丹楓吹盡面旋隨風舞夜寒霜月飛來伴孤旅還
是獨擁秋衾夢餘酒困都醒滿懷離苦甚情緒深念
凌波微步幽房暗相遇汨珠都作秋宵枕前雨此恨音
驛難通待憑征鴈歸時寄將愁去

一寸金

新定作

州夾蒼崖下枕江山是城郭望海霞接日紅翻水面晴
風吹草青搖山脚波暖鳬鷺作沙痕退夜潮正落疎林

外一點炊烟渡口叅差正寥廓 自歎勞生經年何事
京華信漂泊念渚蒲汀柳空歸閒夢風輪雨楫終辜前
約情景牽心眼流連處利名易薄回頭謝冶葉倡條便
入漁釣樂

晁次膺

宣和間克大晟府協律郎與万俟雅言齊名
按月律進詞

黃河清慢

應制作

晴景初升風細細雲收天淡如洗望外鳳皇城闕蔥蔥
佳氣朝罷香烟滿袖侍臣報天顏有喜夜來連得封章
奏大河徹底清泚 君王壽與天齊馨香動上穹頻降
祥瑞大晟奏功六樂初調宮徵合殿薰風乍轉萬花覆
千官盡醉內家傳詔重開宴未央宮裏

水龍吟

早春

倦遊京洛風塵夜來病酒無人問九衢雪小千門月淡
元宵燈近香散梅梢凍消池面一番春信記南樓醉裏

西城宴闋都不管人春困
屈指流年未幾早驚人潘
郎雙鬢當時體態而今情
緒多應瘦損馬上牆頭縱
教瞥見也難相認凭闌干
但有盈盈泪眼把羅襟搵

又
梅花

夜來深雪前村路應是早
梅初綻故人念我江頭春
信南枝向暖疎影橫斜暗
香浮動月明清淺向亭邊
驛畔行人立馬頻回首空
腸斷別有玉溪仙館壽陽
人宮粧粉面天教占了百
花頭上和羹未晚最是傷
情處高

樓上一聲羌管仗何人向道爭如留取倚闌干看

鷓鴣天

升平詞

霜壓天街不動塵千官環珮賀成禋三竿閭闔樓邊日
五色蓬萊頂上雲隨步輦卷香裯六宮紅粉倍添春
樂章近與中聲合一片仙韶特地新

清平樂

夏詞

深沈院宇枕簟清無暑睡起花陰初轉午一霎飛雲過
雨雨餘隱隱殘雷夕陽却照庭槐莫把珠簾垂下妨

他雙燕歸來

驀山溪

春情

風流心膽直把春償酒選得一枝花綺羅中算來未有名園翠苑風月最佳時夜迢迢車欸欸是處曾攜手重來一夢池館皆依舊幽恨寫新詩托何人章臺問柳漁舟歸後雲鎖武陵溪水潺潺花片片艤棹空回首

行香子

別恨

別恨綿綿屈指三年再相逢情分依然君初霜鬢我已

華顛況其間有多少恨不堪言
小庭幽檻菊蕊攔斑
近清宵月已嬋娟莫思身外且鬪尊前願花長好人長
健月長圓

万俟雅言

精於音律自號詞隱崇寧中克大晟府製撰
依月用律製詞故多應制所作有大聲集五
卷周美成為序山谷亦稱之為一代詞人

三臺

清明應制

見梨花初帶夜月海棠半含朝雨內苑春不禁過青門
御溝漲潛通南浦東風靜細柳垂金縷望鳳闕非煙非
霧好時代朝野多懼徧九陌太平簫鼓乍驚兒百轉斷
續燕子飛來飛去近綠水臺榭映秋千鬪草聚雙雙遊
女 飴香更酒冷踏青路會暗識天桃朱戶向晚驟寶
馬雕鞍醉襟惹亂花飛絮正輕寒輕暖漏永半陰半晴
雲暮禁火天已是試新粧歲華到三分佳處清明看漢
宮傳蠋炬散翠煙飛入槐府欽兵衛闔闔門開住傳宣

又還休務

戀芳春慢

寒食前進

蜂藥分香燕泥破潤暫寒天氣清新帝里繁華昨夜細
雨初勻萬品花藏四苑望一帶柳接重津寒食近蹴鞠
秋千又是無限遊人紅粧趁戲綺羅夾道青帘賣酒
臺榭侵雲處處笙歌不負治世良辰共見西城路好翠
華定將出嚴宸誰知道仁主祈祥為民非事行春

安平樂慢

都門池苑應制

瑞日初遲緒風乍暖千花百草爭香瑤池路穩閨苑春
深雲樹水殿相望柳曲沙平看塵隨青蓋絮惹紅粧賣
酒綠陰傍無人不醉春光 有十里笙歌萬家羅綺身
世疑在仙鄉行樂知無禁五侯半隱少年場舞妙歌妍空
妬得鶯嬌燕忙念芳菲都來幾日不堪風雨疎狂

卓牌兒

春晚

東風綠楊天如畫出清明院宇玉艷淡泊梨花帶月胭
脂零落海棠經雨單衣怯黃昏人正在珠簾笑語相竝

戲蹴秋千共攜手同倚闌干暗香時度 翠窓綉戶路繚
繞潛通幽處斷魂凝佇嗟不似飛絮閒悶閒愁難消遣
此日年年意緒無據奈酒醒春去

昭君怨

春到南樓雪盡驚動燈期花信小雨一番寒倚闌干
莫把闌干倚一望幾重烟水何處是京華暮雲遮

又

一望西山烟雨目斷心飛何處天外白雲城幾多程

謾記陽關句衣上粉啼痕污隴水一分流此生休

訴衷情

送春

一鞭清曉喜還家宿醉困流霞夜來小雨新霽雙燕舞風斜
山不盡水無涯望中賒送春滋味念遠情懷分付楊花

梅花引

冬怨

曉風酸曉霜乾一鴈南飛人度關客衣單客衣單千里
斷魂空歌行路難寒梅驚破前村雪寒雞啼破西樓
月酒腸寬酒腸寬家在日邊不堪頻倚闌

憶秦娥

天如洗金波冷浸冰壺裏冰壺裏一年得似此宵能幾
等閒莫把闌干倚馬蹄去便三千里三千里幾重雲
岫幾重烟水

又別情

千里草萋萋盡處遙山小遙山小行人遠似此山多少
天若有情天亦老此情說便說不了說不了一聲喚
起又驚春曉

憶少年

隴首山

隴雲溶洩隴山峻秀隴泉鳴咽行人暫駐馬已不勝愁
絕上隴首凝眸天四濶更一聲塞鴈悽切征書待寄
遠有知心明月

長相思

雨

一聲聲一更更窓外芭蕉窓裏燈此時無限情夢難
成恨難平不道愁人不喜聽空堦滴到明

又

山驛

短長亭古今情樓外涼蟾一暈生雨餘秋更清暮雲

平暮山橫幾葉秋聲和鴈聲行人不要聽

雅言之詞詞之聖者也發

妙旨於律呂之中運巧思於斧鑿之外平而工和而雅比諸刻琢句意而求精麗者遠矣

潘元質

倦尋芳

閨思

獸鑲半掩鴛鴦無塵庭院瀟灑樹色沈沈春盡燕嬌鶯

姝夢草池塘青漸滿海棠軒檻紅相亞聽簫聲記秦樓

夜約彩鸞齊跨

漸迤邐更催銀箭何處貪歡猶繫驕

馬旋翦燈花兩點翠眉誰畫香滅羞回空帳裏日高猶
在重簾下恨疎狂待歸來碎揉花打

蘇養直

名伯固號後湖居士

菩薩蠻

春園

園林寂寂春歸去濛濛柳下飄香絮野水接雲橫綠烟
啼曉鶯江南鶉鳩夢山色歸來重小艇小灣頭蘋花
蘋葉舟

鷓鴣天

和康伯可韻

梅妬晨粧雪妬輕遠山依約學眉青樽前無復歌金縷
夢覺空餘月滿林魚與鴈兩浮沉淺顰微笑總關心
相思恰似江南柳一夜東風一夜深

又

楓落河梁野水秋淡烟衰草接郊丘醉眠小塢黃茅店
夢倚高城赤葉樓天杳杳路悠悠鈿箏歌扇等閒休
灞橋楊柳年年恨鴛浦芙蓉葉葉愁

阮郎歸

春恨

西園風暖落花時
綠陰鶯亂啼
倚闌無語惜芳菲
絮飛胡蝶飛
緣底事減腰圍
遣愁愁著眉
波連春渚暮天垂
燕歸人未歸

木蘭花令

江雲疊疊遮鴛浦
江水無情流
薄暮歸帆初張葦
邊風客夢不禁篷
背雨渚花不解留
人住只作深愁無盡處
白沙烟樹有無中
鴈落滄洲何處所

李蕭遠

名祁少有詩名官至尚書郎宣和間責監漢

陽酒稅

如夢令

不見玉人清曉長歎一聲雲杪碧水滿蘭塘竹外一枝
風裊竒妙竒妙半夜山空月皎

水龍吟

郎官湖

碧山橫繞清湖茂林秀麓波光裏南宮老大西州漂蕩

危樓重倚雨步雲行餌風飲霧平生遊戲笑此中空洞
都無一物有神妙浩然氣 掃盡雲南夢北看三江五
湖秋水狂歌兩解清尊一舉超然千里江漢蒼茫故人
何處山川良是待白蘋露下青天月上約騎鯨起

醉桃源

春風碧水滿郎湖水清梅影疎渡江桃葉酒家壚髻鬟
雲鬢梳 吹玉蘂飲雲腴不須紅袖扶少年隨意數花
鬢老來心已無

減字木蘭花

梨花院宇澹月傾雲初過雨一枕輕寒夢入西瑤小道
山花深人靜簾鎖御香清晝永紅藥闌干玉按春風
窈窕間

孫浩然

離亭燕

一帶江山如畫風物向秋瀟灑水浸碧天何處斷霽色
冷光相射蓼嶼荻花洲掩映竹籬茅舍雲際客帆高

挂烟外酒旗低亞多少六朝興廢事盡入漁樵閒話悵
望倚層樓寒日無言西下

李重元

憶王孫

春詞

萋萋芳草憶王孫柳外樓高空斷魂杜宇聲聲不忍聞
欲黃昏雨打梨花深閉門

又

夏詞

風蒲獵獵小池塘過雨荷花滿院香沈李浮瓜冰雪涼

竹方床針線慵拈午夢長

又秋詞

颼颼風冷荻花秋明月斜侵獨倚樓十二珠簾不上鉤
黯凝眸一點漁燈古渡頭

又冬詞

彤雲風掃雪初晴天外孤鴻三兩聲獨擁寒衾不忍聽
月籠明窓外梅花瘦影橫

查奎

透碧霄

惜別

艤蘭舟十分端是載離愁
練波送遠屏山遮斷此去難
留相從爭奈心期久要屢變
霜秋歎人生杳似萍浮又
翻成輕別都將深恨付與東流
想斜陽影裏寒烟明處
雙槳去悠悠愛渚梅幽香動
須採掇倩纖柔艷歌繁發
誰傳餘韻來說仙遊念故人
留此避州但春風老後
秋月圓時獨倚江樓

林少詹

少年遊

早行

霧霞散曉月猶明疎木挂殘星山徑人稀翠蘿深處啼
鳥兩三聲霜華重迫駝裘冷心共馬蹄輕十里青山
一溪流水都做許多情

花卷詞選卷七